



Savez izviđača Federacije Bosne i Hercegovine
Scout Association Federation of Bosnia and Herzegovina

STATUT

Saveza
izviđača
Federacije
Bosne i
Hercegovine

Skautski pokret u svijetu začet je 1907. godine od strane Lorda Roberta Baden Pauela. Ovaj statut se vodi duhom saradnje, prijateljstva i bratstva Svjetskog skautskog pokreta.

Na osnovu člana 12. i 14. Zakona o udruženjima i fondacijama (Službene novine Federacije Bosne i Hercegovine, broj 45/02.) Skupština Saveza izviđača Federacije Bosne i Hercegovine, na svojoj sjednici održanoj 11.03.2023. godine u Sarajevu, je d o n i j e l a :

STATUT

Saveza izviđača Federacije Bosne i Hercegovine

I | Opće odredbe

Član 1.

Ovim Statutom reguliše se: 1) naziv i sjedište; 2) ciljevi i djelatnost; 3) zastupanje i predstavljanje; 4) organi udruženja, njihove ovlasti, način imenovanja i opoziva, trajanje mandata, kvorum i pravila glasanja, uključujući i pitanja o kojima se odlučuje kvalificiranom većinom, funkciju lica ovlaštenog da saziva skupštinu; 5) oblik i sadržaj pečata; 6) sticanje i raspolaganje imovinom; 7) način donošenja finansijskih izvještaja i izvještaja o radu; 8) postupak za donošenje statuta, izmjena i dopuna statuta i drugih općih akata, 9) uvjete i način učlanjenja, prestanak članstva, kao i prava, obveze i odgovornosti članova udruženja; 10) uvjeti i postupak za pripajanje, razdvajanje, transformaciju ili prestanak rada udruženja 11) pravila za raspodjelu preostale imovine u slučaju prestanka rada udruženja SAVEZ IZVIĐAČA FEDERACIJE BOSNE I HERCEGOVINE.

Član 2.

Udruženje - Savez izviđača Federacije Bosne i Hercegovine (U daljem tekstu: SIFBiH) je nastao dobrovoljnim udruživanjem pravnih lica izviđačkih odreda koji djeluju na teritoriji Federacije Bosne i Hercegovine.

Udruženje se upisuje u registar udruženja, čime stiče svojstvo pravnog lica sa pravima, odgovornostima i obavezama, koje proističu iz tog svojstva.

II | Naziv, sjedište i područje djelovanja

Član 3.

Naziv Udruženja je: Udruženje SAVEZ IZVIĐAČA FEDERACIJE BOSNE I HERCEGOVINE.

Skraćeni naziv Udruženja je: SIFBiH.

Sjedište SIFBiH je u Sarajevu, Mehmed paše Sokolovića br. 2.

Član 4.

SIFBiH djeluje na području Federacije Bosne i Hercegovine i šire, u skladu sa zakonom.

Član 5.

SIFBiH može promijeniti naziv, sjedište i područje djelovanja.

O promjenama iz stava 1. ovog člana odlučuje Skupština

Član 6.

SIFBiH je član Saveza izviđača u Bosni i Hercegovini putem kojeg ostvaruje svoja prava u Svjetskoj organizaciji Skautskog pokreta (The World Organization of the Scout Movement).

SIFBiH može uspostaviti saradnju sa drugim tijelima i organizacijama koje djeluju u skladu sa metodom i principima Svjetske skautske organizacije.

Član 7.

Rad SIFBiH je javan.

Javnost rada se ogleda u pravovremenom informisanju članstva i šire javnosti o radu SIFBiH.

Član 8.

Savez izviđača Federacije Bosne i Hercegovine je dobrovoljna, nepolitička, obrazovna i vaspitna organizacija za mlade, otvorena za sve bez obzira na nacionalno porijeklo, pol, rasu ili vjeru, u saglasnosti sa ciljem, principima i metodom Svjetske skautske organizacije.

III | Ciljevi i djelatnost

Član 9.

Cilj Saveza je okupljanje i pomaganje aktivnosti organizacionih jedinica, radi razvoja punih fizičkih, umnih, društvenih i duhovnih potencijala mladih ljudi, članova tih organizacionih jedinica, kao pojedinaca, odgovornih građana i članova lokalnih, nacionalnih i međunarodnih zajednica.

Ovo se postiže kroz:

- uključivanje mladih, u godinama formiranja, u proces neformalnog obrazovanja;
- izviđački metod postepenog samoobrazovanja radom u malim grupama, uz podršku odraslih koji su spremni i sposobni da iznesu svoju obrazovnu ulogu;
- progresivne i stimulativne programe raznih aktivnosti, zasnovane na potrebama djece i mladih, uključujući igre, korisne vještine i služenje društvu, koji se uglavnom odigravaju na otvorenom prostoru u dodiru sa prirodom.
- korištenje specifičnih metoda koje svakog pojedinca čine glavnim činiocem svog razvoja, kao osobe koja se oslanja na sebe, koja je spremna da pruži podršku, koja je odgovorna i posvećena provođenju Misije Svjetske skautske organizacije;
- pružanje pomoći na uspostavljanju sistema vrijednosti zasnovanog na duhovnim, socijalnim i ličnim principima, kako je to iskazano u izviđačkom Zavjetu i Zakonu;

IV | Programske osnove

Član 10.

Izviđaštvo je zasnovano na sljedećim principima:

Obaveza prema duhovnom traganju - odanost duhovnim načelima koja obuhvataju pronalaženje vlastitog puta za upoznavanje sebe i svijeta oko sebe.

Obaveza prema drugima - odanost svojoj zemlji sa zalaganjem za unapređenje lokalnog, nacionalnog i međunarodnog mira, razumjevanja i saradnje. Učestvovanje u razvoju društva, sa priznavanjem i poštovanjem dostojanstva drugog čovjeka i cjelovitosti svijeta prirode.

Obaveza prema sebi - odgovornost za razvoj sopstvene ličnosti.

Član 11.

Članovi izviđačke organizacije se dijele na sljedeće kategorije članstva:

- Poletarci i pčelice, uzrast 6 do 11 godina
- Mlađi izviđač i planinka, uzrast 11 do 15 godina
- Izviđač i planinka, uzrast 15 do 18 godina
- Stariji izviđač – brđani seniori, 18 do 30 godina
- Stariji izviđač – brđani veterani starost preko 30 godina

Član 12.

Članovi izviđačke organizacije svoje ciljeve i zadatke ostvaruje na temeljima Obećanja, Závjeta i Zakona.

Član 13.

Od svih članova izviđačke organizacije se traži da polože Závjet i pridržavaju se Zakona, koji glase:

Za poletarce:

- Obećanje poletaraca
Obećavam da ću voljeti svoju domovinu,
da ću tragati za najvećom istinom i ljubavlju,
da ću dobro učiti, biti vrijedan i
da ću svaki dan učiniti dobro djelo.
- Zakoni poletaraca
 1. Poletarac je pošten
 2. Poletarac pomaže drugima
 3. Poletarac je vrijedan

Za izviđače:

- Zavjet izviđača
Dajem časnu riječ,
da ću čuvati svoju domovinu,
da prihvatam duhovnu stvarnost i da ću tragati za njenim punim značenjem,
da ću pomagati drugima i
da ću živjeti i raditi po izviđačkim zakonima.

Zakoni izviđača

1. Izviđaču je čast da mu vjeruju.
2. Izviđač je odan.
3. Izviđač je koristan, nesebičan i pomaže drugima.
4. Izviđač je svima prijatelj i brat svakog drugog Izviđača.
5. Izviđač je učtiv.
6. Izviđač upoznaje prirodu, voli je i čuva.
7. Izviđač poštuje svoje roditelje i odrasle.
8. Izviđač je vedar i društven.
9. Izviđač je štedljiv i vrijedan
10. Izviđač je čist u misli, riječi i djelu.

Član 14.

Članice SIFBiH se, u skladu sa Programom SIFBiH, organiziraju u:

- radne jedinice:
jato – za pčelice i poletarce;
vod – za mlade izviđače i planinke i izviđače i planinke;
klub – za brđane i brđanke (seniore i veterane)
- osnovne jedinice: čete i posade (porječani i pomorci);
- organizacione jedinice: odred izviđača

Organizacione jedinice na području općine/grada i kantona, mogu se udruživati u Savez općine/grada, odnosno, kantona.

V | Zastupanje i predstavljanje

Član 15.

SIFBiH zastupa i predstavlja Predsjednik SIFBiH.

U slučaju odsutnosti ili spriječenosti Predsjednika, SIFBiH zastupa i predstavlja Potpredsjednik SIFBiH.

Lice iz stava 1. ovog člana može dati drugom licu pismenu punomoć za zastupanje i predstavljanje SIFBiH.

VI | Organi SIFBiH

Član 16.

Organi SIFBiH su:

1. Skupština SIFBiH
2. Predsjedništvo SIFBiH (Upravni odbor)
3. Predsjednik i potpredsjednik SIFBiH
4. Načelnik SIFBiH
5. Nadzorni odbor
6. Sud Časti
7. Statutarna komisija

Skupština SIFBiH

Član 17.

Skupština SIFBiH je najviši organ upravljanja SIFBiH.

Radom Skupštine SIFBiH rukovodi Predsjednik Skupštine, čiji je mandat 4 godine uz mogućnost jednog uzastopnog izbora.

Skupštinu SIFBiH čine po 2 (dva) punoljetna predstavnika svakog člana SIFBiH, sa po jednim glasom.

Predstavnici članica SIFBiH ne mogu biti aktuelni članovi Predsjedništva, Nadzornog odbora, Suda časti i Statutarne komisije.

Član 18.

Skupština SIFBiH punovažno odlučuje ako sjednici prisustvuje natpolovična većina članova.

Odluke Skupštine SIFBiH su punovažne ako za njih glasa natpolovična većina prisutnih članova.

O donošenju Statuta, njegovim izmjenama i dopunama, statusnim i imovinskim promjenama, prestanku rada SIFBiH, odluke Skupštine su punovažne ako za njih glasa 2/3 predstavnika (delegata) svih članica (odreda) SIFBiH-a.

Bliže odredbe o radu Skupštine regulišu se Poslovníkom o radu Skupštine

Član 19.

Skupština SIFBiH se sastaje po potrebi, a najmanje jednom godišnje.

Skupštinu SIFBiH saziva Predsjednik Skupštine.

Skupština SIFBiH saziva se najmanje trideset dana prije njenog održavanja.

: Prijedlog za sazivanje sjednice Skupštine mogu dati Predsjednik SIFBiH, Potpredsjednik SIFBiH, ili 1/3 članova SIFBiH-a. Inicijativa mora biti obrazložena, a predlagač priprema nacrt dokumenta za sjednicu Skupštine.

Ukoliko Predsjednik Skupštine ne sazove vanrednu sjednicu Skupštine u roku od 60 dana od podnošenja prijedloga za sazivanje sjednice Skupštine, predlagač iz prethodnog stava ovog člana će sam sazvati sjednicu Skupštine.

U slučajevima potrebe ili vanrednih okolnosti proglašениh od strane nadležnih organa sjednica Skupštine se može održati i on-line i odvijati će se prema odredbama važećeg Poslovnika

Član 20.

Skupština SIFBiH:

- donosi Statut, izmjene i dopune statuta, izmjene i dopune Poslovnika o radu Skupštine i druge akte određene statutom;
- daje saglasnost na pravne radnje poduzete u postupku osnivanja SIFBiH;
- bira i opoziva Predsjednika skupštine SIFBiH, Predsjednika SIFBiH, Potpredsjednika SIFBiH, članove Predsjedništva SIFBiH, Načelnika SIFBiH, članove Nadzornog odbora, članove Suda časti i članove Statutarne komisije.
- usvaja izvještaje koje je pripremiло Predsjedništvo SIFBiH;
- usvaja program rada SIFBiH i finansijski plan SIFBiH,
- usvaja izvještaj o radu SIFBiH i finansijski izvještaj SIFBiH,
- odlučuje o udruživanju u saveze, pripajanju, razdvajanju, transformaciji, prestanku rada i drugim statusnim promjenama SIFBiH;
- usvaja izvještaj Nadzornog odbora, a u slučaju ne usvajanja istog provodi postupak vanjske revizije;
- usvaja izvještaj Suda časti i odlučuje o disciplinskim mjerama prema članovima organa SIFBiH i članicama SIFBiH
- usvaja izvještaj Statutarne komisije SIFBiH
- odlučuje o svim pitanjima koja nisu u nadležnosti drugog organa.

Predsjedništvo i njegova tijela

Član 21.

Predsjedništvo SIFBiH je izvršni organ SIFBiH.

Predsjedništvo broji 15 članova uključujući Predsjednika, Podpredsjednika i Načelnika, sa jednakim pravom glasa.

Predsjedništvo može izvršiti izmjenu člana Predsjedništva u skladu sa ovim Statutom i u slučajevima koje propisuje Poslovnik o radu Predsjedništva.

Izmjenu člana predsjedništva prema stavu 3. ovog člana potvrđuje Skupština SIFBiH na prvoj narednoj sjednici.

Mandat Predsjednika, Podpredsjednika, Načelnika i članova Predsjedništva traje 4 godine, uz mogućnost još jednog uzastopnog reizbora.

Svaki član Predsjedništva je odgovoran za realizaciju odluka i zaključaka Predsjedništva, bez obzira na njegov lični stav.

Nijedan član Predsjedništva neće se smatrati niti biti smatran predstavnikom bilo koje jedinice.

Član 22.

Predsjedništvo SIFBiH punovažno odlučuje kada na sjednici prisustvuje natpolovična većina članova.

Odluke Predsjedništva su punovažne ako za njih glasa 2/3 prisutnih članova Predsjedništva.

Član 23.

Predsjedništvo SIFBiH se sastaje po potrebi, a najmanje četiri puta godišnje.

Sjednice Predsjedništva saziva Predsjednik, a u slučaju njegove spriječenosti ili odsutnosti sjednicu saziva Potpredsjednik.

Druga pitanja iz djelokruga rada Predsjedništva i njegovih tijela bliže se određuju Poslovnikom o radu Predsjedništva i Pravilnikom o dužnostima, ovlastima i odgovornostima u SIFBiH.

Član 24.

Predsjedništvo ima slijedeća prava i obaveze:

- Rukovodi radom SIFBiH između dvije sjednice Skupštine;
- Stara se o zakonitosti rada SIFBiH;
- Priprema i predlaže nacrt izmjena Statuta i drugih akata koje donosi Skupština;
- Sprovodi i izvršava politiku, zaključke i druge odluke Skupštine SIFBiH;
- Odlučuje o načinu obavljanja stručnih, administrativnih, finansijsko-računovodstvenih i drugih sličnih poslova za potrebe SIFBiH;
- Pruža podršku aktivnostima i inicijativama načelstva SIFBiH;
- Priprema sjednice Skupštine SIFBiH;
- Podnosi godišnje i periodične izvještaje o svom radu Skupštini na usvajanje;
- Odlučuje o dodjeljivanju zvanja, odlikovanja i priznanja SIFBiH;
- Brine o izvršenju obaveza prema SluBiH, Svjetskoj organizaciji izviđačkog pokreta, članicama SIFBiH, Državnim organima;
- Sarađuje sa izviđačkim organizacijama drugih država, kao i drugim organizacijama, udruženjima, i fondacijama u skladu sa odredbama ovog Statuta i u duhu principa Svjetske skautske organizacije;
- Utvrđuje program rada i finansijski plan i predlaže Skupštini na usvajanje;
- Upravlja materijalnim i finansijskim sredstvima SIFBiH;
- Na osnovu razmatranja i izvještaja Suda časti priprema Skupštini prijedloge disciplinskih mjera
- Radi izvršavanja poslova i zadataka iz svog djelokruga, formira stalne i privremene komisije, imenuje i opoziva njihove članove;
- Imenuje i opoziva članove Načelstva;
- Donosi Poslovnik o svome radu, pravilnike i druge akte radi izvršavanja poslova iz svog djelokruga;

- Donosi odluku o visini članarine;
- Bira na osnovu konkursa najboljeg kandidata za obavljanje poslova Sekretara SIFBIH-a i opoziva u slučaju neaktivnosti ili nezadovoljenja uslova.
- Obavlja i druge poslove koji nisu stavljeni u nadležnost drugim organima SIFBiH.

Član 25.

Predsjednik Predsjedništva SIFBIH je Predsjednik SIFBiH.

Potpredsjednik Predsjedništva SIFBIH je Potpredsjednik SIFBiH.

Predsjednik Predsjedništva SIFBiH potpisuje odluke Predsjedništva i koordinira ukupnu aktivnost SIFBiH.

U slučaju spriječenosti ili odsutnosti Predsjednika, njegove funkcije obavlja Podpredsjednik.

Predsjednik i podpredsjednik SIFBIH

Član 26.

Predsjednik SIFBiH:

- zastupa i predstavlja SIFBIH,
- saziva i predsjedava sjednicama Predsjedništva SIFBIH
- stara se o primjeni Statuta, pravilnika i drugih akata SIFBIH
- pokreće pitanja i aktivnosti od neposrednog interesa za djelovanje SIFBIH i šireg društvenog značaja
- organizira rad na sprovođenju zaključaka Skupštine i Predsjedništva
- stara se da svi članovi Predsjedništva budu blagovremeno informirani o svim pitanjima iz djelokruga njihovog rada
- ostvaruje koordinaciju sa organima vlasti, obrazovnim i drugim institucijama, organizacijama i zajednicama
- potpisuje odluke, dokumenta i ostala akta koja donosi Predsjedništvo
- preduzima i druge potrebne mjere koje su neodložne, a u interesu su sprovođenja Programa, Statuta i Plana rada SIFBIH
- obavlja i druge poslove u skladu sa Zakonom, Statutom, Programom, Pravilnicima i drugim općim aktima Saveza.

Predsjednik SIFBiH može, ako se za to ukaže potreba, sazvati sjednicu svakog od tijela Saveza.

Član 27.

Potpredsjednik SIFBiH pomaže Predsjedniku SIFBIH u obavljanju njegovih dužnosti i obaveza i zamjenjuje ga u slučaju njegove spriječenosti ili odsutnosti, u skladu sa odredbama ovog Statuta.

Potpredsjednik SIFBiH u okviru svojih prava i obaveza obavlja naročito slijedeće poslove:

- u dogovoru sa Predsjednikom provodi aktivnosti na realizaciji stavova, zaključaka i odluka Predsjedništva,

- predsjedava sjednicama Predsjedništva kada je Predsjednik spriječen da istima prisustvuje,
- obavlja i druge poslove koje mu odredi Predsjednik ili Predsjedništvo.

Načelstvo SIFBIH

Član 28.

Načelstvo SIFBIH, je operativno-stručno tijelo Predsjedništva SIFBIH, čijim radom rukovodi Načelnik SIFBIH.

U slučaju spriječenosti ili odsutnosti Načelnika, načelstvom rukovodi član kojeg on odredi.

Načelstvo SIFBIH izvršava odluke Skupštine i Predsjedništva Saveza, a u operativno-stručnom smislu rukovodi radom SIFBIH.

Načelstvo se sastaje po potrebi, a najmanje 4 puta godišnje, i odluke donosi natpolovičnom većinom svih članova.

Načelstvo može, za pomoć u svom radu, imenovati radne grupe ili pojedince za provedbu pojedinih akcija, kojima se mogu povjeriti trajni zadaci do isteka mandata Načelstva, ili određeni vremenski ograničeni zadatak.

Član 29.

Članovi načelstva nose naziv načelnika za ostvarivanje aktivnosti iz određenih oblasti Plana i Programa SIFBIH, i pojedinačno su odgovorni za provođenje tih aktivnosti.

Načelnike za pojedine oblasti imenuje Predsjedništvo SIFBIH, na prijedlog Načelnika, i to:

- načelnika za obrazovanje kadrova i brđane i brđanke
- načelnika za poletarce i pčelice
- načelnika za mlađe izviđače i planinke
- načelnika za izviđače i planinke
- načelnika za međunarodne odnose
- načelnika za informiranje

Po ukazanoj potrebi, Načelnik može predložiti imenovanje načelnika i za druge operativno stručne poslove Saveza, pored načelnika iz prethodnog stava.

Načelstvo broji najmanje 7, a najviše 10 članova.

Načelnik SIFBIH

Član 30.

Načelnik SIFBIH je odgovoran za stručno-operativno rukovođenje Načelstva SIFBIH i obavlja zadatke utvrđene ovim Statutom, Planom, Programom, Pravilnicima i drugim općim aktima SIFBIH.

Načelnik Saveza:

- sprovodi aktivnosti na realizaciji Plana i Programa SIFBIH,

- saziva i predsjedava sjednicama Načelstva SIFBiH,
- sprovodi odluke Skupštine i Predsjedništva iz djelokruga rada Načelstva, i stara se o sprovođenju odluka, stavova i zaključaka Načelstva,
- stara se da članovi Načelstva budu redovno i blagovremeno informirani o svim pitanjima od značaja za rad Načelstva i Saveza u cjelini,
- zajedno sa članovima načelstva priprema i predlaže Predsjedništvu nacрте i prijedloge elaborata akcija, seminara, savjetovanja i dr.
- redovno informira Predsjedništvo o radu Načelstva, a Skupštini podnosi izvještaj o radu Načelstva,
- obavlja i druge poslove i zadatke od interesa za rad SIFBIH, a koji proizilaze iz ovog Statuta, kao i zadatke koje mu odredi i za koje ga ovlasti Predsjedništvo SIFBIH.

Sekretar SIFBIH

Član 31.

Sekretara Saveza bira Predsjedništvo na osnovu raspisanog konkursa na period do 1 godine sa mogućnošću produženja ugovora.

Sekretar sprovodi odluke tijela SIFBIH i za svoj rad odgovara Predsjedništvu SIFBIH.

Odgovornosti i ovlaštenja Sekretara, bliže se uređuju Poslovníkom o radu Predsjedništva.

Sekretar nije član Predsjedništva

Nadzorni odbor

Član 32.

Nadzorni odbor je organ od 3 člana, izabrana na sjednici Skupštine SIFBIH na mandat od 4 godine, uz mogućnost još jednog reizbora.

Članovi Nadzornog odbora između sebe biraju Predsjednika.

Nadzorni odbor radi u sjednicama koje saziva Predsjednik nadzornog odbora kada to ocijeni potrebnim, a najmanje dva puta godišnje, ili na zahtjev bilo kojeg rukovoditelja SIFBIH, kao i na zahtjev bilo koje članice Saveza.

Nadzorni odbor odlučuje natpolovičnom većinom svih članova.

Članovi Nadzornog odbora ne mogu obavljati druge dužnosti u organima SIFBIH.

Član 33.

Nadzorni odbor nadgleda finansijsko i materijalno poslovanje SIFBIH, u skladu sa Zakonom, normativnim aktima i odlukama SIFBIH.

Nadzorni odbor daje tijelima SIFBIH primjedbe i prijedloge o poslovanju iz njihovog djelokruga, o kojima su ona dužna raspravljati i pismeno se izjasniti.

Nadzorni odbor nadzire finansijsko i materijalno poslovanje Saveza.

Nadzorni odbor daje tijelima Saveza primjedbe i prijedloge o poslovanju i djelovanju Saveza, o kojima su ona dužna raspravljati i izjasniti se.

Nadzorni odbor podnosi svoj izvještaj o radu Skupštini Saveza. Prijedlozi, preporuke i mišljenja iz izvještaja Nadzornog odbora koji su usvojeni na Skupštini obavezujući su za sve organe Saveza, a njihova realizacija ponovo podliježe Nadzornom odboru u smislu pomoći, nadzora, kontrole i informisanja Skupštine.

Nadzorni odbor podnosi svoj izvještaj o radu Skupštini SIFBiH.

Sud časti

Član 34.

Sud časti je Organ SIFBiH od 3 (tri) člana izabrana na sjednici Skupštine SIFBiH, na mandatni period od 4 (četiri) godine uz mogućnost još jednog reizbora.

Članovi Suda časti na prvoj sjednici između sebe biraju Predsjednika, koji saziva i rukovodi sjednicama Suda časti.

Sud časti, na osnovu Pravilnika o disciplinskim mjerama u SIFBiH, raspravlja i donosi odluke o postupcima članica Saveza i njihovih članova, te zvaničnika i članova tijela Saveza, kojima su narušili ugled i dostojanstvo Saveza, ogriješili se o Zavjet i Zakone izviđača, ili grubo povrijedili odredbe ovog Statuta, i na njemu utemeljenih pravilnika i Programa SIFBiH.

Kad Sud časti raspravlja o članovima udruženih članica Saveza, koji nisu zvaničnici ili članovi tijela Saveza, o svojoj odluci obavještava Štab članice radi poduzimanja disciplinskih mjera u skladu sa Pravilnikom o disciplinskim mjerama SIFBiH.

Postupak za pokretanje disciplinskih mjera može se pokrenuti na prijedlog Skupštine, Predsjedništva ili bilo koje članice (odreda) SIFBiH-a.

Sud časti odlučuje natpolovičnom većinom svih svojih članova.

Žalba na odluke suda časti podnosi se Predsjedništvu, koje prijedloge podnosi Skupštini, čija je odluka konačna.

Članovi Suda časti ne mogu obavljati druge dužnosti u organima SIFBiH.

Statutarna komisija

Član 35.

Statutarna komisija SIFBiH je Organ SIFBiH od 3 (tri) člana izabrana na sjednici Skupštine SIFBiH, na mandatni period od 4 (četiri) godine uz mogućnost još jednog reizbora.

Članovi Statutarne komisija SIFBiH na prvoj sjednici između sebe biraju Predsjednika, koji saziva i rukovodi sjednicama Statutarne komisija SIFBiH.

Zadaci Statutarne komisije su da:

- donese poslovnik o svom radu,
- tumači odredbe Statuta i drugih statutarnih odluka i akata SIFBiH,
- analizira i kontroliše primjenu Statuta i predlaže postupak njegovih izmjena i dopuna,

- ocjenjuje i donosi odluke o usklađenosti ostalih općih akata organa SIFBiH-a, kao i akata članica (Odreda) sa ovim Statutom
- razmatra i rješava žalbe statutarnog karaktera koje SIFBiH-u upućuju članovi ili organi SIFBiH-a
- obavlja i druge poslove u vezi s primjenom Statuta.

Statutarna komisija izvještaj o svom radu podnosi Skupštini SIFBiH.

VII | Članstvo u SIFBiH

Član 36.

Članstvo u SIFBiH je dobrovoljno.

Članovi SIFBiH mogu postati:

- Svi registrovani odredi izviđača na teritoriji Federacije Bosne i Hercegovine koji su donijeli odluku o udruživanju u SIFBiH i koji ispunjavaju uslove iz Pravilnika o registraciji izviđačkog Odreda u SIFBiH.

Član 37.

Članovi SIFBiH svojim statutima i drugim opštim aktima uređuju svoje unutrašnje odnose, način organizovanja i djelovanja u skladu sa vlastitim potrebama, ali u saglasnosti sa principima Svjetske organizacije Skautskog pokreta, Statutom i opštim aktima SIFBiH.

Član 38.

Članovi SIFBiH imaju jednaka prava da:

- Sa svojim članovima sudjeluju u aktivnostima i obrazovanju koje organizira SIFBiH;
- Organizuju nacionalne, regionalne ili lokalne aktivnosti SIFBiH-a;
- Sudjeluju u ostvarivanju djelatnosti SIFBiH-a;
- Koriste prava i pogodnosti koje proizilaze iz članstva u SIFBiH-u;
- Koriste obilježja SIFBiH-a;
- Sudjeluju u upravljanju davanjem prijedloga i mišljenja i iznošenjem stavova;
- Budu informisani o radu SIFBiH-a i njegovih tijela;
- Predlažu članove u sva radna i savjetodavna tijela SIFBiH-a;
- Putem svojih predstavnika sudjeluju i odlučuju u općem tijelu upravljanja na način propisan Statutom;
- Predlažu članove u tijela upravljanja SIFBiH-a;
- Koriste pomoć i potporu SIFBiH-a u ostvarivanju svojih članskih prava;

Način ostvarivanja pojedinih prava može se detaljnije odrediti opštim aktom SIFBiH-a.

Član 39.

Članovi SIFBiH su obavezni da:

- poštuju Statut, pravilnike i odluke organa SIFBiH;
- međusobno sarađuju radi ostvarivanja ciljeva i zadataka iz nadležnosti SIFBiH;

- poštuju izviđačke principe i dosljedno ih se pridržavaju u svom djelovanju;
- učine sve da onemoguće bilo kakvu političku, vjersku, polnu ili rasnu diskriminaciju u svom djelovanju i djelovanju svojih članova;
- plaćaju propisanu članarinu SIFBiH.
- sprovode Programski minimum propisan od strane Načelstva SIFBIH-a

Član 40.

Članstvo u SI FBiH prestaje:

- istupanjem po vlastitoj volji člana SIFBiH,
- u skladu sa Pravilnikom o registraciji izviđačkog Odreda u SIF BiH.
- isključenjem odlukom Skupštine na prijedlog Suda časti

VIII | Pečat i štambilj

Član 41.

SIFBIH ima pečat i štambilj.

Pečat je okruglog oblika, prečnika 30 mm, u koji je upisan naziv i sjedište SIFBIH – Savez Izviđača Federacije Bosne i Hercegovine Sarajevo, na službenim jezicima Federacije Bosne i Hercegovine, a u sredini se nalazi znak SIFBiH.

Štambilj je pravougaonog oblika, u koji je upisan naziv i sjedište SIFBiH, sa prostorom za upisivanje broja i datuma.

Način upotrebe i čuvanja pečata i štambilja SIFBIH-a regulira se Pravilnikom, koji donosi Predsjedništvo SIFBiH..

IX | Obilježja

Član 42.

SIFBiH ima znak, amblem i zastavu.

Znak Saveza je javorov list zelene boje u kome se nalazi bijeli krin sa stiliziranom magnetnom iglom i prstenom zelene boje i dvije zelene petokrake zvijezde u gornjem dijelu spoljnjih latica krina.

Amblem SIFBiH je kružnog oblika sa podlogom smeđe boje obrubljen stiliziranim užetom zlatne boje u čijoj sredini se nalazi znak Saveza a oko znaka je latiničnim pismom, bijelim slovima, ispisano „Savez izviđača Federacije Bosne i Hercegovine”.

Zastava je pravougaonog oblika, zelene boje, veličine 200 x 100 centimetara, sa znakom Saveza u sredini. Zastava je obrubljena trakom sa zlatnim resama. Obje strane zastave su iste boje.

Oblik, sadržina, boje i dimenzije znaka, amblema i zastave Saveza izviđača Federacije Bosne i Hercegovine bit će propisane posebnim pravilnikom.

Član 43.

SIFBiH ima svoj Dan izviđača-izvidništva Federacije BiH, koji se obilježava 01. augusta.

X | Sticanje i raspolaganje imovinom

Član 44.

Imovinom, koju čine nepokretne i pokretne stvari, novac i vrijednosni papiri, upravljaju organi SIFBIH i isti su odgovorni za njeno raspolaganje i korištenje.

Organi SIFBIH dužni su upravljati imovinom Udruženja sa posebnom pažnjom.

Ako SIFBIH obavlja privrednu djelatnost, dužnost je organa koji raspolaže imovinom za obavljanje te djelatnosti, da njome upravlja sa posebnom pažnjom.

Član 45.

Članovi organa SIFBIH dužni su osigurati da se svi pravni poslovi SIFBIH sklapaju po tržišnoj vrijednosti, ili pod uvjetima koji su povoljniji za SIFBIH.

Član 46.

SIFBiH osigurava sredstva od:

- članarine,
- prihod iz budžeta
- dobrovoljni priloz i zavještanja
- sponzorstva
- prihodi ostvareni prodajom izviđačke i druge literature i opreme,
- prihodi od vlastite privredne djelatnosti,
- prihodi od imovine
- ostali prihodi, stečeni u skladu sa zakonom i Statutom.

Član 47.

Sredstva SIFBIH se utvrđuju i raspoređuju finansijskim planom.

Odluku o utrošku sredstava donosi Predsjedništvo.

Nalogodavci za izvršavanje finansijskog plana su predsjednik ili podpredsjednik

Član 48.

SIFBiH može u skladu sa izviđačkim principima, radi pribavljanja finansijskih sredstava formirati preduzeće ili sklopiti ugovore sa drugim pravnim licima za obavljanje djelatnosti.

XI | Finansisko izvještaj i izvještaj o radu

Član 49.

SIFBIH je u obavezi uredno voditi poslovne knjige i sastavljati finansijske izvještaje u skladu sa propisima.

Član 50.

Predsjedništvo SIFBIH sastavlja i podnosi na usvajanje Skupštini godišnji izvještaj o radu i godišnji finansijski izvještaj.

Na zahtjev Skupštine, Predsjedništvo SIFBIH sastavlja i podnosi periodične izvještaje o radu i finansijske izvještaje.

XII | Donošenje i izmjene i dopune Statuta i drugih općih akata

Član 51.

Statut je osnovni opći akt SIFBIH.

Statutom se reguliraju pitanja iz člana 14. Zakona o udruženjima i fondacijama.

Statut donosi Skupština SIFBIH.

Član 52.

Izmjene i dopune Statuta SIFBIH vrše se po postupku propisanom za njegovo donošenje.

Inicijativu za izmjene i dopune Statuta može dati 1/2 članova Skupštine SIFBIH, kao i najmanje 1/5 članova SIFBIH.

Inicijativa za izmjene i dopune Statuta se podnosi Predsjedništvu, koje će, ukoliko ocijeni da je inicijativa opravdana, pripremiti i predložiti nacrt izmjena, odnosno dopuna i podnijeti ga Skupštini na odlučivanje.

Ostale opšte akte donose organi SIFBiH, prema djelokrugu svog rada.

XIII | Uvjeti i postupak za pripajanje, razdvajanje, transformaciju i prestanak rada SIFBiH

Član 53.

SIFBIH se može udruživati u Saveze izviđača na državnom i međunarodnom nivou, u skladu sa zakonom i ovim Statutom.

Odluke iz stava 1. ovog člana donosi Skupština, ukoliko za takvu odluku glasa 2/3 članova Skupštine.

Član 54

SIFBiH prestaje sa radom dobrovoljno i po sili zakona.

Odluku o dobrovoljnom prestanku rada SIFBiH donosi Skupština SIFBiH, kada za takvu odluku glasa 2/3 članova Skupštine.

SIFBiH prestaje sa radom u slučajevima iz člana 43. Zakona o udruženjima i fondacijama.

XIV | Raspodjela imovine u slučaju prestanka rada

Član 54.

Odlukom o prestanku rada, Skupština SIFBiH utvrđuje se na koga se prenosi imovina SIFBiH.

XV | Završne odredbe

Član 56.

Ovaj Statut stupa na snagu danom donošenja.

Član 57.

Svi članovi SIFBiH su dužni da svoje Statute usaglase sa ovim Statutom, u roku od 12 mjeseci od dana njegovog donošenja.

Član 58.

Autentično tumačenje odredbi ovoga Statuta daje Skupština Udruženja.

U Sarajevu, 11.03.2023. godine.

Predsjednik Skupštine:

Dragan Ivanković-Danga